



Verwysing: 20190819-8047
Lêerno.: 12/12/41/1
Navrae: Sien paragraaf 10

Omsendbrief: 0035/2019
Vervaldatum: 31 Maart 2021

Aan: Adjunk-direkteurs-generaal, Hoofdirekteure, Direkteure, Kringbestuurders, Hoofde: Bestuur en Beheer, Adjunkdirekteure by distrikskantore, Prinsipale en voorsitters van beheerliggame van alle artikel 21 gewone openbare skole

Kort opsomming: *Besonderhede oor die finansiële toewysing aan artikel 21-skole vir die 2020/21-boekjaar en riglyne vir die verkryging van goedere en dienste.*

Onderwerp: Artikel 21-skole: Norme-en-standaarde-befondsing vir skole, graad 1–12 — finansiële toewysings vir die 2020/21-boekjaar

1. Toewysing

Die voorlopige norme-en-standaarde (N&S)-toewysings vir artikel 21-skole vir die volgende drie jaar, vir die tydperk vanaf 01 April 2020 tot 31 Maart 2023, is op SOBIS beskikbaar. Toegang kan daartoe verkry word deur die volgende te doen:

- Teken aan op SOBIS.
- Kies "Public Ordinary".
- Kies skool.
- Klik "Proceed". Kies dan die "Administration"-opsie op die kieslys en klik op "Norms and Standards Allocation". Kies "N&S 2020/21".
- Druk die bladsy.

Let asseblief op die volgende:

- 1.1 Toewysings word bereken ooreenkomstig die voorskrifte in paragraaf 108 tot 114 van die Nasionale Norme en Standaarde vir Skoolbefondsing (NNSSB), soos gepubliseer in *Staatskoerant* No. 29179 van 31 Augustus 2006.

- 1.2 Volgens paragraaf 110 van die NNSB, dui die Nasionale Teikentabel, soos gepubliseer in *Staatskoerant* No. 42445 van 06 Mei 2019, die 2020 geteikende bedrag per leerder aan. Die geenskoolgelddrumpel sal R1 466 wees.

Nasionale Teikentabel vir die skooltoewysing vir graad 1–12 (2020–2022)

	2020	2021*	2022*
NK1 Geen gelde	1 466	1 547	1 631
NK2 Geen gelde	1 466	1 547	1 631
NK3 Geen gelde	1 466	1 547	1 631
NK4 Geen gelde	1 466	1 547	1 631
NK5 Geen gelde	1 466	1 547	1 631
NK4 Gelde betaalbaar	735	776	818
NK5 Gelde betaalbaar	254	268	282
Geenskoolgelddrumpel	1 466	1 547	1 631

* Syfers vir 2021 en 2022 (aangepas by geprojekteerde inflasiekoers) is die geprojekteerde nasionale teikens wat gekommunikeer is.

- 1.3 Die voorlopige toewysings is op grond van die 2019 10^{de} dag Kitsopname-inskrywings bereken.
- 1.4 Die Wes-Kaap Onderwysdepartement (WKOD) sal die leerderinskrywings van alle skole met die 2020 10^{de} dag Kitsopname nagaan. **Finale toewysingsbriewe** sal teen 16 Maart 2020 op SOBIS gepubliseer word.

2. Betalingskedere

2.1 Skoolgeldskole

Skole sal hul N&S-toewysing vir die 2020/21-boekjaar in twee betalings ontvang, naamlik 60% in April–Mei 2020 en 40% in Oktober–November 2020. Artikel 21-skole moet hul eerste oordragbetaling (60%) gebruik om hul 2021 leer- en onderrigondersteuningsmateriaal (LOOM) via hul eie verskaffers of die aanlynbestelstelsel aan te koop sodat dit voor die einde van September 2020 beskikbaar sal wees, en om vir ander uitgawes te betaal, soos in paragraaf 3.1 hieronder uiteengesit. Die tweede oordragbetaling (40%) moet gebruik word om toepaslike skoolverwante uitgawes tot 31 Maart 2021 te dek. Waar die WKOD enige LOOM namens skole aanskaf, sal sodanige koste van die tweede oordragbetaling afgetrek word.

2.2 Geenskoolgeldskole

Van die totale N&S-toewysing wat in April–Mei 2020 oorbetal word (kyk paragraaf 2.1 hierbo), moet 20% teruggehou word vir lopende bedryf van **niefpersoneeluitgawes**. Skole sal in die N&S-toewysingsbrief van hierdie bedrag in kennis gestel word. Hou in gedagte dat hierdie bedrag die skool tot April 2021 moet onderhou wanneer betaling vir die volgende boekjaar ontvang sal word.

3. Benutting van die toewysing

3.1 Die N&S-toewysing is hoofsaaklik bedoel vir LOOM, plaaslike aankope, munisipale dienste, noodsaaklike daaglikse instandhouding van skoolgeboue, terreine en toerusting (niegeskeduleerde instandhouding), en ander lopende uitgawes, waarby werksessiegelde, TV-lisensies, Internetdiensverskaffers, skoolidmaatskap van opvoedkundige verenigings, posgeld, telefoonoproepe, huur van toerusting, ouditeringsgelde, bankkoste, regsdienste, reklame, sekuriteitsdienste, openbare vervoer of vervoer van leerders, huur van voertuie, versekering en kopieerdienste ingesluit is. Eie inkomste, soos in paragraaf 6 hieronder bedoel, moet eers gebruik word om tekorte in bogenoemde verband te dek voordat dit aangewend word vir die finansiering van beheerliggaamposte.

Daar word aanbeveel dat skole hul beskikbare toewysing vir 2020/21 soos volg tussen die onderskeie uitgawekategorieë verdeel:

- 30% vir LOOM-bestellings vir 2021 waarvan 10% spesifiek op biblioteekmateriaal gerig moet wees (elke leerder moet 'n handboek vir elke vak hê). Die voorraad skoolbiblioteekmateriaal moet jaarliks aangevul word totdat die totale getal items die minimum van die internasionale standaard van 10 items per leerder weerspieël. (Kyk paragraaf 3.1.1 hieronder vir die lys met items wat onder LOOM val.)
- 20% vir plaaslike aankope
- 25% vir munisipale dienste **(Skole moet egter begroot vir 'n groter persentasie as uitgewetendense dit noodsaak.)**
- 25% vir instandhouding **(waarvan 25% van hierdie toewysing vir herstelwerk en die verkryging van nuwe toerusting om die skool te beveilig, opsy gesit behoort te word).**

3.1.1 Leer- en onderrigondersteuningsmateriaal (LOOM)

(a) Die Departement van Basiese Onderwys (DBO) definieer LOOM as enige materiaal wat onderrig en leer direk in die klaskamer of by die huis (tuiswerk) ondersteun en fasiliteer. Dit sluit die volgende in:

- Handboeke, leesboeke, naslaanboeke, voorgeskrewe werke, atlasse en woordeboeke
- Werkboeke
- Plakkate, land- en muurkaarte
- Opvoedkundige bordspeletjies
- Biblioteekmateriaal (fiksie en niefiksie), naslaanboeke, plakkate, en video's wat vooraf opgeneem is, DVD's, CD's, multimedia, ens.
- Rekenaarsagteware en lisensies
- Hulpbronmateriaal vir opvoeders, leerders, klaskamers en biblioteke

(b) Daar word van skole verwag om hul volle LOOM-toewysing te gebruik vir die aankoop van LOOM wat die implementering van die Kurrikulum- en assesseringsbeleidsverklaring (KABV) in hul klasse sal verryk en versterk. Skole word dus aangemoedig om hul LOOM-toewysing vir die aankoop van

aanvullende handboeke, voorgeskrewe werke, atlasse, woordeboeke, werkboeke, plakkate, landkaarte, muurkaarte, opvoedkundige bordspeletjies, biblioteekmateriaal (fiksie en niefiksie), naslaanboeke, video-opnames, DVD's, CD's, rekenaarsagteware, sowel as toerusting vir Verbruikerstudies, Gasvryheidstudies en die wetenskaplaboratorium te benut.

- (c) LOOM-befondsing behoort ook vir intekengeld, aanlyn aansoeke en die hernuwing van kontrakte of eiendomsreg op digitale hulpbronne oorweeg te word. Dit stel skole in staat om LOOM-befondsing te gebruik om digitale hulpbronne aan te skaf in hulle oorgang van tradisionele na digitale leer. Sulke hulpbronne sluit e-boeke sowel as opvoedkundige sagteware in. Die koste daaraan verbonde is tans soortgelyk aan tradisionele gedrukte handboeke en daar is min/geen noemenswaardige vermindering in koste nie. Daar moet voorsiening gemaak word sodat skole in staat is om op hierdie dienste/produkte te kan inteken.
- (d) Onderhewig aan die volgende voorwaardes kan skole minder geld aan LOOM toewys indien:
- elke leerder in die skool oor 'n handboek vir elke vak beskik en toegang tot ander LOOM-hulpbronne het;
 - die skool jaarliks 10% van die LOOM-toewysing vir die aankoop van biblioteekmateriaal toegewys het om die biblioteekvoorraad aan te vul en die totale getal items in die biblioteekvoorraad nou bestaan uit die minimum internasionale standaard van 10 items per leerder; en
 - die beheerliggaam 'n formele besluit aangaande hierdie afwyking geneem het. (Hierdie besluit van die beheerliggaam rakende die begroting wat by 'n ouervergadering voorgelê moet word, moet verduidelik word en die bedrag wat per leerder aan LOOM bestee is, moet voorsien word. Hierdie besluit moet by die ouervergadering voorgelê word, ongeag of dit deur die kringbestuurder ondersteun word of nie.)
- (e) Hoe om LOOM te verkry:
- Artikel 21-skole moet mededingende kwotasies kry wanneer hulle hul bestellings by verskaffers van LOOM plaas, waar van toepassing, of skole kan aanlyn bestel. Die WKOD stel skole jaarliks (deur middel van omsendbriewe) oor die tydsraamwerke vir die bestel van KABV-aanvullingshandboeke op SOBIS in kennis.
 - Wanneer aanvullende LOOM bestel word, moet skole alle KABV-handboeke uit die goedgekeurde nasionale katalogusse kies — verwys na goedgekeurde nasionale katalogusse wat op die WKOD se webwerf by beskikbaar is. <http://wcedonline.westerncape.gov.za/index.html>
 - Vir bystand met die kies van skoolbiblioteekmateriaal moet skole onderskeidelik met mnr. Timothy Cloete/mnr. Aubrey Africa, EDULIS-koördineerder: Skoolbiblioteekdienste, by tel. 021 957 9626/9628 in verbinding tree. Die distrik se skoolbiblioteekadviseur en/of bronnensentrum-koördineerder kan ook in verband met die ontwikkeling van hul skoolbiblioteke gekontak word.

3.1.2 Munisipale dienste

- (a) Die N&S-toewysing aan skole is bedoel vir die betaling van, onder andere, skole se maandelikse munisipalediensterekeninge, wat elektrisiteit, water, riool- en vullisverwydering (beskikbaarheid- en gebruikskoste) insluit, maar die betaling van eiendomsbelasting uitsluit. Soos in die verlede, sal die staat die eiendomsbelasting op eiendom wat in die naam van die Provinsiale Regering van die Wes-Kaap (PRWK) of, onder sekere omstandighede, die Republiek van Suid-Afrika (RSA) geregistreer is, betaal.
- (b) Skole moet steeds die besparingsmaatreëls wat in Bylae A aangedui word, implementeer.
- (c) Eskom en die meeste munisipaliteite het aangedui dat hulle meters vir voorafbetaalde elektrisiteit aan skole beskikbaar kan stel. Dit sal skole in staat stel om hul elektrisiteitsverbruik beter te beheer. Skole moet Eskom of hul plaaslike munisipaliteit kontak, soos van toepassing, indien hulle voorafbetaalde elektrisiteitsmeters wil laat installeer.
- (d) **Waar dit blyk dat skole nie hul munisipale diensterekeninge vereffen nie, behou die WKOD die reg voor om geld uit die N&S-toewysing terug te hou om uitstaande munisipalediensterekeninge namens die betrokke skole te vereffen.**
- (e) **Alle skole wat die slim watermeterloodsprojek aanvaar het en wat slim watermeters by hulle skole geïnstalleer het, moet befondsing van die munisipale-toewysing opsy sit om die maandelikse slim watermeterkoste te dek.**

3.1.3 Daaglikse instandhouding

- (a) Daaglikse instandhouding is van toepassing op die instandhouding van terreine, reiniging, opknapping, beskermingsdienste, herstel en/of vervanging van gedeeltes van skoolgeboue en sekuriteitsmeganismes. **Gereelde instandhouding moet gedoen word om die agteruitgang van skole en noodherstelwerk as gevolg van verwaarloosing te verhoed.**
- (b) **Waar die N&S-toewysing vir daaglikse onderhoud onvoldoende is, word van skole verwag om, waar nodig, die toewysing uit hul eie inkomste aan te vul.**
- (c) Skole moet vir hul daaglikse instandhoudingsherstelwerk na gelang van die toestand van hul skoolgeboue en -terreine begroot.
- (d) Skole behoort ook 'n bedrag van hul jaarlikse toewysing vir daaglikse instandhouding opsy te sit vir die:

- instandhouding van toerusting wat gebruik word om die skoolterrein te verbeter, bv. onderhoud van die grassnyer, die aankoop van verf vir tuinbanke op die skoolterrein, en die aankoop van kalk en kunsmis;
- instandhouding van brandbestrydingstoerusting, d.w.s. brandslange, brandwiele, toepaslike brandblussers, ens.;
- noodinstandhouding van sekuriteitsmeganismes of beskermingsdienste wanneer die bestaande sekuriteitsmeganismes (met inbegrip van outomatiese hekke, hekmasjinerie, ens.) by die skool beskadig is as gevolg van inbraak/vandalisme of veroudering; en
- instandhouding van omheining en ander sekuriteitsmeganismes (bv. alarms, interkomstelsels, ens.).

(e) N&S-toewysings mag nie gebruik word vir daaglikse herstelwerk aan koshuise nie. Sodanige herstelwerk moet uit leerders se losiesgeld en beurse befonds word.

4. **Die N&S-toewysing mag NIE vir die volgende gebruik word NIE:**

- **Besoldiging van personeel wat deur die beheerliggaam aangestel is**
- **Nuwe geboue**
- **Koshuisuitgawes**
- **Lenings aan individue of ander inrigtings**
- **Voertuie**

5. **Groot noodherstelwerke**

Ingevolge paragraaf 97 van die NNSSB moet die DBO en/of die WKOD buiten die skooltoewysing, na hulpbronnemeganismes soek om onder andere aandag te gee aan dringende herstelwerk aan die infrastruktuur wat die direkte en/of indirekte gevolg is van historiese onbillikheid van uitgawes en natuurrampe. Die volgende herstelwerk sal ooreenkomstig die *Standard Operating Procedures for Emergency Maintenance in Western Cape Schools, 2014* oorweeg word:

KATEGORIE A

Ernstige skade: Ernstige skade aan die infrastruktuur as gevolg van historiese onbillikheid van uitgawes, natuurrampe, struktuurfoute en/of brande wat 'n negatiewe impak op die voortgesette bedryfsvermoë van 'n skool het en/of 'n gesondheids- en veiligheidsrisiko vir leerders en/of personeel inhou.

Die WKOD sal die implementering van noodherstelwerk oorweeg as 'n skool nie die nodige beskikbare fondse het nie (die instandhoudingstoewysing is uitgeput), en/of nie die nodige vaardigheid het om sodanige werk uit te voer nie, mits die WKOD voldoende fondse beskikbaar het.

6. Eie inkomste

Ingevolge artikel 36(1) van die Suid-Afrikaanse Skolewet (SASW), 1996 (Wet 84 van 1996), moet beheerliggame alle redelike stappe doen om die staatshulpbronne aan te vul ten einde die gehalte van onderwys wat deur die skool **aan alle leerders by die skool** voorsien word, te verbeter. Alhoewel geenskoolgeldskole nie verpligte skoolgeld (met ingegrip van registrasiegelde) mag hef nie, word hulle aangemoedig om vrywillige bydraes (donasies) te werf en by fondsinsamelingsfunksies betrokke te raak.

7. Verslagdoening

7.1 Die goedgekeurde begroting van die skool moet jaarliks teen 01 Desember by die betrokke distrikskantoor ingedien word.

7.2 Alle skole moet binne 30 dae na die einde van die kwartaal (uitgawes tot 30 Junie en 31 Desember) 'n WKOD 043-vorm (sesmaandelikse verslag) by die betrokke distrikskantoor indien. Voorts vereis artikel 43(5) van die SASW dat skole (vir die aandag van die betrokke distriksdirekteur) jaarliks teen 30 Junie 'n afskrif van hul stel geouditeerde finansiële state vir die vorige boekjaar voorlê.

7.3 Fondse sal slegs aan 'n skool oorbetaal word as die distrikskantoor dit as finansiëel sterk sertifiseer, gebaseer op die finansiële bedrywighede van vorige kwartale. **Voorts, indien 'n skool nie voor of aan die einde van die boekjaar as finansiëel sterk gesertifiseer word nie, kan die skool sy N&S-befondsing verbeur.**

8. Verdere voorwaardes

8.1 Die beheerliggaam moet behoorlike beheer oor inkomste en uitgawes uitoefen, soos uiteengesit in die *Handleiding: Basiese Finansiële Stelsel vir Skole*, uitgereik deur die Hoof van die Departement ingevolge artikel 38(1) van die SASW. Indien die lede van die beheerliggaam nie oor die nodige kundigheid beskik om hierdie funksie te verrig nie, moet hulle iemand koöpteer wat hulle kan help.

8.2 Alle skoolfondse, verkry van die staatstoewysing en eie inkomste, moet aangewend word vir doeleindes wat direk met onderwys verband hou, soos bepaal in artikel 37(6) van die SASW, met inbegrip van die aankoop van LOOM. Ingevolge WKOD-beleid mag handboeke en leesboeke nie gefotokopieer word nie aangesien dit neerkom op skending van die Wet op Outeursreg, 1978 (Wet 98 van 1978).

8.3 Die WKOD het die reg om skoolfondsrekords te ondersoek en teen enige lid van die personeel of die beheerliggaam op te tree indien hy of sy by die wanadministrasie van skoolfondse betrokke sou wees. Daarom moet skole alle bewyse van inkomste en uitgawes vir hierdie doel bewaar.

9. **2019/20-toewysing**

Alle uitstaande WKOD 043-vorms vir artikel 21-skole moet **voor of op Vrydag, 31 Januarie 2020** by die distrikskantoor ingedien word om te voorkom dat onbetaalde fondse verbeur word.

10. **Kontaknommers vir navrae**

Onderwerp	Naam	Telefoonnr.
Sesmaandelikse WKOD 043-verslae en geouditeerde finansiële jaarstate	Adjunkdirekteur: Korporatiewe Dienste by distrikskantore	Toepaslike distrikskantoor
Aanlyn handboek- (KABV) bestellingsnavrae	Me. P Phillips Mnr. B le Keur	021 467 2326 021 467 2094
Algemene navrae oor betalings	Mnr. D Harrison Me. N Mtongana Me. N Petersen	021 467 2727 021 467 2703 021 467 2701
Noodherstelwerk	Mnr. N Sutcliffe Mnr. K Mkunjulwa Mnr. S Naidoo	021 467 2568 021 467 2334 021 467 2219
e-Leer EDULIS-koördineerder: Skoolbiblioteekdienste	Mnr. C Walker Mnr. T Cloete	021 467 2351 021 957 9626
Algemene navrae: Norme en Standaarde (enige betalingsverwante navrae uitgesluit)	Mnr. L Sangqu Mnr. L van Wyk Faksno.:	021 467 2608 021 467 2658 086 731 8900

GETEKEN: PAD BEETS

WAARNEMENDE HOOF: ONDERWYS

DATUM: 2019-09-26

BESPARINGSMAATREËLS TEN OPSIGTE VAN MUNISIPALE DIENSTE

ELEKTRISITEIT

- (i) Buiteligte moet gedurende die dag afgeskakel wees.
- (ii) Slegs wanneer natuurlike lig onvoldoende is, moet klaskamerligte gedurende die dag aangeskakel word.
- (iii) Slegs die sekuriteitsligte en die hoekklaskamers se ligte moet saans aangeskakel word.
- (iv) Gedurende naweke en skoolvakansies moet bogenoemde ligte (kyk (iii)) saans aangeskakel en soggens afgeskakel word.
- (v) Die installering van meters vir voorafbetalde elektrisiteit moet oorweeg word aangesien skole beter beheer oor hul gebruik van en besteding aan elektrisiteit sal kan uitoefen. Eskom en die meeste ander munisipaliteite het aangedui dat dit vir hulle moontlik sal wees om hierdie meters te installeer.

WATER

- (i) Munisipale waterbeperkings, soos van tyd tot tyd deur plaaslike owerhede uitgereik, vervang enige ander vereistes en moet, behalwe enige ander riglyne, streng nagekom word.
- (ii) Watersproeiers moet spaarsamig gebruik word en toegedraai word wanneer grasperke en blombeddings nat genoeg is. Daar is diensverskaffers wat waterbeperkingsmeters installeer. So 'n opsie moet deur skole oorweeg word.
- (iii) Die watertoevoer na urinale en krane buite die geboue kan met behulp van afsluitkrane afgesluit word wanneer dit nie benodig word nie, byvoorbeeld ná skoolure en veral oor naweke.
- (iv) Personeel moet seker maak dat alle krane behoorlik toegedraai is voordat hulle die skoolterrein verlaat.
- (v) Toevoerpype en watermeters moet gereeld vir moontlike lekkasies en foute getoets word. Die volgende prosedure moet gevolg word:
 - Wanneer die skool vir die dag sluit, maak seker dat alle krane toe is en neem die meterlesing.
 - Neem weer 'n meterlesing die volgende oggend voordat enige krane oopgedraai word.
 - Vergelyk die lesings en indien daar 'n verskil is, volg die volgende stappe:
 - Wanneer die skool die volgende dag sluit, draai die afsluitkrane toe en neem die meterlesing.
 - Neem weer 'n lesing die volgende oggend voor die afsluitkrane oopgedraai word.
 - Indien daar steeds 'n verskil tussen die lesings is, dui dit daarop dat die watermeter foutief is of dat daar 'n pyp lekkasie is.
 - Tref onmiddellik reëlings vir die herstel van die foutiewe watermeter en/of pyp.

VULLISVERWYDERING

Monitor die aantal vullisdromme wat gebruik word. Plaaslike owerhede hef normaalweg 'n tarief per drom. Dit is dus belangrik dat so min moontlik vullisdromme gebruik word. Daar kan ook oorweging geskenk word aan die aanstelling van 'n privaat kontrakteur om die skool se vullis te verwyder.